

摛藻堂四庫全書薈要

集部

欽定四庫全書

明詩綜卷六十二

集部

翰林院檢討朱彝尊編

朱燮元

一首

燮元字懋和紹興山陰人萬曆壬辰進士除
大理評事累官兵部尚書兼右都御史總督
川湖雲貴加太師有恒岳遺橐

靜志居詩話太師儀表豐偉飲噉倍十餘人
其莅湖南川貴土司以壺漿乾肉迎車前相

接于道公傾槃倒甌一無留餘衆皆驚歎曰
此天人也相誠不敢出犯歲既久威望著于
西南比之蜀相諸葛云公詩不多作句如買
得勞薪先煮酒不嫌疎鬚也簪花荒徼有誰
憐白髮故園亦自有青
山越人至今傳誦之

馬嵬坡

六龍回轡此重過遺恨秋墳掩襪羅南內蕭蕭風雨夜
淒涼應比壽王多

王在晉

一首

在晉字明初太倉州人

履歷注
濬縣

萬曆壬辰進

士除中書舍人歷官太子少保兵部尚書有
龍沙會草越鐫楚編蘭江集遼海集西湖小
草

道傍歌

莫作道傍民道傍之民多苦辛莫作道傍舍道上之人
行徹夜南來北往齊叩門只聞門外聲爭喧厨下無薪
馬無料暮夜行人索火照官家不聞給一錢叫呼不應
揮長鞭紈如已急三更鼓道路之人走旁午五里一堡

寒無烟寥落人家不得眠貴人如此夜行促點火無茅

且拆屋

畢自嚴

一首

自嚴字景曾淄川人萬曆壬辰進士除松江
府推官累官戶部尚書加太子太保卒贈少
保有石隱園藏橐

塗次詠桃花

綠楊春樹陰芳鄰中有夭桃別樣新馬上不煩頻指點

好花應笑白頭人

李騰芳 一首

騰芳字子實湘潭人萬曆壬辰進士改庶吉士
授簡討歷官禮部尚書兼翰林院學士贈太子

太保有李宗伯集

博望驛

孤亭瞰虛空危闌翼石壁亭亭數株松雲端發深碧起
視羣巒層溪光亂相射盤梯花倒看入閣烟相逼雨過

萬瓦鳴燈殘四郵夕踈星柳外明河漢看不隔去矣問

津人空思泛查客

劉一焜 二首

一焜字元丙南昌人萬曆壬辰進士除行人擢
吏部主事歷郎中升太常少卿以右僉都御史
巡撫浙江有石間山房集

清蹕

清蹕歸何晚刊山紀漢功猶餘玄石碣竟墮鼎湖弓社

稷三犁後園林百戰中如何膏血盡辛苦事和戎

寄題金山寺

長江流日夜縹緲一峯殊落景疑飛動盤根定有無雲
端清磬濕樹杪佛聖_{一作}燈孤幾見登臨客扁舟下五湖

張五典

一首

五典字和衷沁水人萬歷壬辰進士授行人
遷戶部主事歷員外郎中出為山東參議累
遷大理卿加兵部尚書贈太子太保有海虹

集

送喬倣我

長路天涯外驅車背朔風三秋驚別鶴千里慕征鴻尊
酒荒城外關山落照中前程行色晚裘馬自匆匆

王愛

愛字仁甫宛平人

履歷注任丘人

萬歷壬辰進士除潞

安推官入為戶部主事歷員外郎中升陝西參

政進右布政使有息機園存橐

縣山道中

昔賢棲隱地兩壁盡高山入夏風應凜經春花未斑烟
猶遺俗禁廟許如人還平定州娘子關有妒女祠唐立李諶作頌傳是介之推妹

馬看唐碣神林不可攀

神林大樹腹中有郭令公碑禁樵采

徐必達

一首

必達字德夫嘉興人萬曆壬辰進士知太湖溧
水二縣升南吏部主事累官南京兵部左侍郎

有南州草

讌集巾山

憤山山寺倚江隈脫幘仙人去不迴華頂峯連雙塔迴
海門潮湧片帆來疎松礙月娟娟淨細竹含風个個開
握手共成雲外契一回清話一傾杯

蘇茂相一首

茂相字宏家晉江人萬曆壬辰進士除戶部主
事累官戶部左侍郎總督倉場尚書再加太子

太傅改刑部尚書

弔方正學先生

寧海侯城里停車意愴然
風雲蕭瑟氣天地革除年臣
罪單辭定孫枝一葉傳龍山
真突兀彷彿首陽巔

李本緯一首

本緯字君章錦衣衛籍曲沃人萬曆壬辰進士
除鞏昌府推官仕至山東右布政使有灌蔬園

集

發張掖甘泉樓

乍別酒泉郡來登張掖樓
關雲排檻入塞水背城流
夜湧陂塘月寒生草樹秋
凭高聽不盡羌管數聲愁

石九奏一首

九奏字伯成冀州人萬曆壬辰進士授大理評
事歷寺副寺正出知萊州府以憂歸補兗州升
開原兵備副使進右參政

春郊

三月長安花正飛長河隄畔柳依依獨憐芳草王孫路

立盡東風不肯歸

岳和聲

一首

和聲字爾律嘉興人萬曆壬辰進士除汝陽
知縣入為禮部主事遷貟外郎出知慶遠府
調贛州以憂歸補東昌升福建提學副使轉
廣西參政以右僉都御史巡撫延綏有餐微

子集

柳林操

并序

秣陵有柳林者建文殉難臣黃侍中觀暨夫人
二女墓在焉侍中奉詔勤王夫人知必及于難
先事招魂葬之江上而後自沈于江兩女并溺
死岳子展其墓而悲之作柳林操

河瀰瀰兮白日翳露塗塗兮不可以履吾足陷於汙泥
兮不如其蹈於水上顧滄浪之天兮下矣夫子

金忠士

二首

忠士字元卿宿松人萬曆壬辰進士除樂平知

縣擢廣西道御史巡按貴州浙江河南轉福建
左參政累官僉都御史巡撫延綏卒贈兵部右

侍郎有旭山集

瞻尼父像

瞻彼百泉流春來何湜養新廟貌崔嵬儼存尼父像日
月雖遞更素王靈不爽俎豆有明禋光輝在吾鄙瞻依
適所願聖門如指掌嗟哉戶外人宮牆隔天壤

慨時

黃帕朱幡紫貝囊朱衣小隊儼成行奉何敕使留都去
為摘楊梅四月嘗

陳懿典一首

懿典字孟常秀水人萬曆壬辰進士改庶吉士
授編修歷少詹事有吏隱齋集

李公翼招飲柰子花下

淑景春城暮聯鑣韋曲來共尋金谷墅同泛竹林杯
縞夜分穠李生香喻早梅不愁風雨至只恐暝鐘催

吳士奇 一首

士奇字無奇歙縣人萬曆壬辰進士除知寧化縣調歸安升南京戶部主事歷官陝西左布政使遷太常寺卿有綠滋館集

詩話太常留心國史草成副書藏于家遺橐為江都汪楫存貯較諸野史頗純正第稍畧

耳詩特餘藝
要非所長

灑瀝

孤根夾浪擁江間百二層巒片石關急峽倒流天上水

高灘下指榜頭山形同牛馬心逾怖舟近魚龍膽詎殊
聽說風波前更惡來朝百丈費牽攀

李日華 十首

日華字君實嘉興人萬曆壬辰進士除九江
府推官謫汝州判官轉西華知縣徵遷南京
禮部主事升尚寶司丞歷太僕少卿有恬致

堂集

詩話太僕恬澹自持居官日淺優游田里以
法書名盡自娛家近春波橋為吳仲圭舊里

暇寫墨竹兼擅雲山其詩非選非唐別裁風
格頗與王辰玉陳仲醇同流微尚纖豔近家

宴集

語

石佛寺水鑑房

秋來風日好瀟灑放輕船僧院房房竹沙邨處處橋清
吟黃葉句雅坐白雲寮妙悟仍相許時煩慧遠招

挽吳少君

海上孤明月天南失少微江山餘涕淚冠蓋盡歎欷泉
咽莓苔井雲封薜荔衣梅花三萬樹差可想容輝

春日送徐問卿北上

青莎白鷺洲細雨桃花岸看乘春水船遙遙到天畔

題海湛畫卷

溪漁罷釣歸殘雪蓑上落暝色踏扁舟翩然似孤鶴

贈顧長卿

碧桐風葉響虛廊細葛輕含午夜涼不獨疎螢能照掌
明河高映讀書堂

山居絕句

二首

雪花撩亂撲春蟲擁褐單牀睡思濃夢裏一聲聞折竹

呼僮亟徙小盆松

四月雨晴山路香松花灑地鶴翎黃輕衫短笠荷鉏去
斲得青芝一尺長

贈維揚王孝廉中玄

蕪城春雨漲江沙沙上紅樓映遠花一抹濃烟萬株柳
紫骝嘶入玉鈎斜

贈陳禹玉

木蘭零落海棠殘風雨蕭蕭欲釀寒花氣曉來渾不定

暗隨春夢到江干

書贈小友張叔度

張緒風流正妙年一春常自手芸編偶隨草色湖堤去

醉裏逢人墮馬鞭

謝肇淛

四十首

肇淛字在杭長樂人萬曆壬辰進士除湖州

推官移東昌遷南京刑部主事調兵部轉工

部郎中出為雲南參政升廣西按察使歷左

布政使有小草堂集

李本寧云在杭樂府豐約文質適得其中五古

瞻而不俳華而不靡七古音節鮮明氣勢沈鬱五七言律長律比偶精嚴絕句意在筆先韻在言外春容警策短長合度大都率循古法而中有特造孤詣體無所不備變無所不盡今詩道向衰予將以在杭為砥柱焉

張幼于云在杭蓄藻于建安騰聲于慶歷希躅于少陵泛駕于長慶蕪綜潘陸妙契陶韋其

辭宛以麗其氣雄以健其據思優以雋其援

事典以則其振響和以平既美才情尤深寄興

屠緯真云謝君詩峭蒨秀偉卓然名家

王伯穀云在杭詩寄興微而綴詞雅取調古而命意新秀若可餐沃其堪挹穆如溫潤

以雅以南
杭詩沖融婉至深于性情
陸無從云在

詩話在杭格不聳高而詩律極細其持論亦
平如子鱗元美敬美子與伯玉皆所傾心漫
與詩云徐陳里閈久相親鍾李湖湘非吾鄰
九泥久已封函谷怕見江東一片塵徐指孝
廉維和山人興公陳謂文學汝大孝廉幼孺
山人振狂是時景陵派已盛行而在杭能距
之又云石倉衣鉢自韋陶吳越從風赤幟高
若問老夫成底事雪山銀海鴻秋濤此則在
杭自任匪淺矣

示湘潼二弟

於乎小子各敬爾守無婦言是用沈湎于酒惟勤無斁

維慎無咎惟德惟厚可以長久往者不可追聊慰爾後
於乎戒之天命不又

發真州別諸子

折坂無安蹄風林少寧翼頽波既東徂熹光復西匿行
子逐轉蓬朝旰不遑息擬垂邦江綸仍脂薊門軾仰送
鴻鴈翔俯攀楊柳色別緒若絲棼欲言涕沾臆早歲負
好修中道遭反側行止信盈虛風波安終極白璧委精
光何當重拂拭揮手從此辭他鄉復異域贈君以孟勞

持此長相憶

雨霽寄陳隱君

新晴動花氣鳥啼漳水春出門見芳草忽憶山中人種
藥斸雲母煮石炊松薪甲子誰能識空山無四鄰

寒夜感懷

凜凜歲云暮歸鴻浩南征客心渺天末役役哀吾生撫
劍中夜起碧宇何淒清霜氣襲四野素月流前楹寒燈
黯欲滅萬籟聞無聲欲奏思歸引淚與朱絲并調孤絃

易絕山鬼徘徊鳴浮生無期別離恨何時平

秋日邀龍君御同鍾伯敬林茂之賦詩君御將赴

湟中

營道寡高操大音謝俗機誰云京洛塵而能縕素衣前
蹤旣云邈後會安可希斗酒自斟酌蟹螯秋正肥南陸
有殘暑西山無留暉不知松際月已挂花間扉雜坐忘
磬折緒談閒芬菲君今赴河湟戎馬生郊畿紅顏誰見
賞青雲願多違舊歡意未浹新離淚仍揮余亦倦遊者

因之歌式微

桃丘歲暮作

衡門杜俗轄時與參求親三旬九梳髮不知昏與晨早來踐繁霜積霰紛成塵白日光慘澹氣色黯不伸始知玄律窮黍谷無回春歲功忽云改勞生猶艱辛四鄰起寒杵惻惻傷我神天地固有盡年華安足云

偕李元祉水部游蜀山

一水劃為山兩湖東西匯漕渠貫其中盈盈若衣帶西

湖漸成陸東湖淼無屈千頃碧琉璃風雲互變態中流
一卷石突起砥洎泮金鏡浮芙蓉銀盤捧螺黛荒祠久
零落花籬皆破敗雞柵倚龜趺燕泥凝佛背開尊面南
浦雲水澹相對漁艇散復集鳴榔出深瀨蒲行交亂流
帆檣遶天外濤驚山影搖波漾日光碎恍如金焦間疑
在蓬壺內憑虛倏往還已隔人天界浮雲何時閒勝游
與君會回首空烟波疎鐘隱林靄

十六夜彭城對月

辭家席未暖望舒倏已圓初隱層峯外俄挂高城巔徘徊麗絳闕濺灑搖紫淵遠望杳無際忽覺在我前流輝照綺席素波相澄鮮玉宇何淒清孤鶴唳中天寒江挹平楚離離含輕烟美人天一方皓魄私自憐但恐佳辰邁弦望自推遷胡為勞我心愁對江楓眠

安平宋尚書禮祠

文皇既定鼎上國勤灌輸汶流久湮絕負載勞牛車戴
鉢一以壩分水開龍渠畚鍤不再舉天府盈倉儲誰建

平成烈共城宋尚書挽彼澶漫流盈盈歸尾閣至今會
通河俎豆紛庭除白英獲侑食流慶及餘胥

劉尚書大夏祠

引黃濟汶水譬彼借寇兵龍性不恒馴況乃與之爭百
年罕成績問殫吾山平忠宣纘禹緒四載勞經營上流
既南絕猛勢隨東傾載下淇園竹永奠宣房名蛟鼈徙
窟穴柔櫓多歡聲沉馬不可再寄言厔守成

望點蒼山

點蒼十九峯一一芙蓉青絲亘百餘里凝張雲母屏鳥
道當太白鐵壁排高冥白雲遶其腹玉帶橫萬釘一峯
一溪流奔卸如建瓴散入市廛間家家鳴琮琤遠近注
畛隰禾黍藉生成陰崖四五月積雪輝廣庭陽光照不
及力與造化爭北麓產文石玉質聲瓏玲濃澹合圖畫
蒼素何分明追琢豈天巧醞釀誠地靈馮河不可極乖
龍猶潛腥林巒非一狀蘭若棼連甍相對不數武空翠
盈胸櫺奇境趣自合絕域心所輕悠然獨長嘯忘此支

離形

送練中丞遺裔歸家

有序

自金川門之變練公子寧以御史大夫抗節死
闕下閩門荼毒獨有侍媵抱匝歲子匿民間得
免展轉入閩為人傭保六世孫綺者為新寧陳
孝廉掌書記萬曆戊戌孝廉計偕入浙有江右
楊生應祥同舟先一夕生夢練公持刺謁己心
異之比入孝廉船見書記侍側雅哲不羣指問

何姓答曰練生心動叩之曰得非吾里練中丞
後乎綺不應而涕淚滿面生益疑駭窮詰之具
得其狀亟以百金為贖孝廉不受遣綺綺不肯
行曰以死徇國人臣之恒且九族亦矣歸將何
為生益賢之歸家具白當事者以幣來聘授以
衣巾俾奉公祠官為置田廬百畝一時聞者莫
不歎息泣下以為天道有知云

燕山日黑黃塵起金川門外鼓聲死長樂宮為瓦礫場

殿庭流血成海水御史大夫練子寧手持三尺干雷霆
覆巢自分無完卵一門百口歸冥冥事去人亡二百載
蘆荻蕭蕭餘故壘長陵松柏已十圍孤臣遺骨今安在
釣龍臺下水可楫新寧城東山截葉灌園誰能識法章
傭肆猶堪藏李變一日天迴地轉時千金購出練家兒
若教之鬼終不餒行路聞之皆歎欷我登鍾陵山遙望
石頭城寧為孝孺死不作陳瑛生為君慷慨終一曲悲

風颯颯江波綠

少年行

鎖甲帶明犀輕裝出御隄銀牀調舞馬金距鬪鳴雞酒
向新豐醉花從杜曲迷春寒何處宿楊柳玉樓西

折楊柳

青樓大道傍垂柳復垂楊白馬黃金勒春風何處郎柔
支繁縝素腕香絮裏啼妝看盡年年別曲終空斷腸

丙申書事

羽檄飛千里天災及兩宮君王聞罪已社稷付和戎海

汎乘春急山田望歲空孤舟有嫠婦灑淚五湖東

谷里

谷里三家市仍為暴雨淹逢人無漢語入饌有戎鹽溪
釣青鱗小邨沽白釀甜亂峯相對晚空翠滿茅檐

十月吳江舟中晚望

年年改歲長為客無奈愁心付酒缸寒鴈背風歸越諸
孤帆帶雨下吳江黃知霜後柑三寸白起沙邊鷺一雙
日落洞庭天似水青山無數入雲牕

送孫子長之滸墅

度支使者權吳閼飽看姑蘇郭外山稅減任教商船過
吏稀長對戰門閒灣中銷夏留僧住橋上行春載鶴還
西望吳興衣帶水舊時玉筍已成班

安平署中述懷五十六韻

丘壑元吾好風塵力未勝謾言金馬隱翻作土牛乘賜
履三河遠封章六郡承幸無官長罵時有簿書仍地重
飛艘集曹閒老吏能挹河城似玦臨水署為冰北極通

幽薊南流控魯滕穆陵齊地壯淮甸楚天澄畚鍤冬還
舉帆稌歲屢騰郵籤妨午夢官舫促晨興面目隨人改
文章避世稱寧知貧是病轉覺愛為憎旅食愁新況離
羣憶舊朋彈碁時映竹開卷夜挑燈方外忘年友山中
結夏僧露華紅璧芳冰水綠翻菱遂電青絲騎排雲白
角鷹胡姬春釀壓趙女晚妝凝寶帶鳴條脫銀牀織鼯
鼈夢迴香火篆歌闋月藏棱玉笛吹橫塞彌弧走射堋
鄰多窺宋玉酒或送王弘仗劖經吳苑觀濤過廣陵名

山皆蠟屐絕壑獨擔簷象闕通瑤極燕山應玉繩雲衢
隨地望天路得階升蜩鶯飛將奮駿駘價亦增詞猶慙
色絹宴已預紅綾捧日心常繫從雲氣倍蒸詎知鶴鷺
侷便隔鹿麋層綏忝郎官貴齒均刺史憑分符行郡國
蓬羽後農永未學操刀割彌深捧玉競雲霄霜翮勁象
緯彩毫凌但欲深懷瑾何知遠避矰風雲變蒼狗天地
亂青蠅蔓菲終安用蹉跎亦自應積薪甘似汲投杼更
疑曾舉世羞駢指何人問折肱沙蟲吹未了塞馬失何

曾白眼終難變紅顏轉自矜擬拋雞肋去勉就鶴書徵
冀北千金駿圖南六月鵬寒流河漭瀛秋色岱嶺增北
郭竿長溫東山屐再登無勞沉璧馬祇惜費金繒健恐
薪垂盡沙防岸善崩桃花無怒浪瓠子有荒塍樓迴隨
雲度亭虛任月昇榜師聲欸乃稚子髮鬍鬢蟻穴容周
弁龍門媿李膺全身看奕局守口固緘縢宿鳥知驚彈
傷魚已遠譽鴻心元矯矯蟲羽故翩翩趨舍寧無定升
沈固不恒長歌聊自適休弔剡溪藤

春怨

長信多春草愁中次第生君王行不到漸與玉階平

秋怨

明月憐團扇西風怯綺羅低垂雲母帳不忍見銀河

早行山中

驅車入雲烟連山齊雪色怪禽作鬼啼枯樹如人立

宿吳山寄長安舊人

春時相送出燕都秋到江南一字無半夜寒燈數行淚

滿天風雨下西湖

錢唐逢康元龍

黃梅細雨暗江關
我入西吳君欲還
馬上相逢須盡醉
明朝知隔幾重山

聞鐘寄曾人倩

十年去國夢滄浪
夜夜鐘聲似上陽
謾憶長安驅馬伴
東華門外月如霜

鼓山采茶曲

雨前初出半巖香十萬人家未敢嘗一自尚方停進貢

年年先納縣官堂

重過分水關

一水中分兩不回
關頭原是望鄉臺
不知客淚能多少
二十年中五度來

雨中度北峽關

溪流屈曲路巉巉
細雨斜風轉不堪
惟有馬頭雲霧裏

青山一片似江南

盧江道中見風沙

四野黃塵欲暮天
行人駐馬淚潸然
自從歸去江南路
不見風沙已一年

入齊界

楚山淮水苦風烟
纔到滕陽又一天
溝外短牆牆外柳
一條官路直如弦

渡汶河

霜飛月落野雞啼
霧瑣長林水拍堤
夾岸人家寒未起

孤舟已過汎河西

田真墓

汎河如帶日西斜
禾黍荒邨四五家
惟有田真墳畔樹
春風猶發紫荊花

淮上重送永奉

輕黃柳色綠
烟含欲折
行人自不堪
兩岸梨花寒食雨
孤舟今夜泊淮南

夢作

白鶴屏寒月影稀水精簾卷篆烟微生憎柳絮如蝴蝶
撩亂春愁處處飛

春日遡汶河作

東風殘雪繫蘭橈滿目山川對寂寥記得門前春水滿
美人蕉壓赤闌橋

舟滯安山

百丈方舟一綫泉待風待閘兩留連客程莫笑蹉跎甚
拙宦何如上水船

葛陽道中雜詩

二首

雨中新水漲平沙芳草連天鳥道斜隔水松門人不閉
斷橋流水紫藤花

烏桕成林稻滿畦新築白酒配黃雞老農醉卧無人喚
日落子規頭上啼

醴陵

萍鄉西上萬山低路入湘南近五溪日暮東風吹雨急
連天芳草鷦鷯啼

桃源道中

春風籬落酒旗閒
流水桃花映碧山
寄語漁郎莫深去
洞中未必勝人間

平壩

愁雲三月風滿溪
一日一程西更西
鬼門關外無相識
頭白老鴉朝暮啼

沈朝煥

二首

朝煥字伯含仁和人萬曆壬辰進士除工部

主事調兵部歷員外郎中謫靖州知州升南

京刑部郎中出為四川按察僉事終福建參

政有泊如齋集

陶周望云伯舍詩情務已出格由古造材富故詞博而工

神完故氣和而暢

王伯穀云伯舍詩才不為法所縛思不為調所泥

龍君御云伯舍

使君守靖詩多溫厚爾雅不露牢騷悱惻不

平之氣曹能始云伯舍詩體固不該而才

足以達意不斤斤師古法而不與古背馳

立秋夜不寐

雨深摧病葉不獨井梧飛候到蟲先覺燈寒燼漸微感

時難穩卧未老漸知非枕上驚秋信明朝換客衣

禁馬

可笑東司馬官無一馬騎自遵臺長約却任吏人嗤捷
足已無路卑棲何處枝不如歸抱犢隨意隴頭宜

鄧原岳

一首

原岳字汝高閩縣人萬曆壬辰進士除戶部主
事歷員外郎中出為雲南提學僉事終湖廣按
察副使有西樓存橐

儀真道中見桃花盛開感而賦之

偏側何偏側行盡江南又江北二月桃花爛漫開燦若朝霞弄春色今年苦雨花較遲江北不如江南時但願春風隨轉轂到處花開迎馬足

王樂善

三首

樂善字存初霸州人萬歷壬辰進士除行人改吏部主事有鶴適軒詩橐扣角集

五渠晚渡

野潦浮平楚扁舟續馬蹄揚舲風漸緊落日望全迷林
暝漁燈出天空雁陣低叩舷歸意嬾情興屬幽棲

春宮曲

輦路春深細草連妝成空坐百花前昭陽昨夜誰承寵
聞道金錢賜董賢

秋宮曲

一從金殿鎖娉婷春鳥秋蛩祇自聽惆悵無心還乞巧

潛來花下拜雙星

袁宏道 二十四首

宏道字無學宗道之弟萬曆壬辰進士除吳

縣知縣改京府學官國子博士遷禮部郎調
吏部移病卒于家有錦帆解脫瀟碧堂餅花

齋華嵩游草破研齋廣陵桃源散篋等集

弟小

修云錦帆解脫意在破人執縛間有率意游戲之語或快爽之極浮而不沈情景太真近而不遠要出自性靈足以蕩滌塵埃學者不察效顰學語其究為俚俗為纖巧為莽蕩焉三寫興有必至非中郎之本旨也陳卧子云石公才情本自流麗李舒章云中郎

淺俗 繆天自云公安之罪薄
于竟陵然啟竟陵者公安也

詩話傳有言琴瑟既敝必取而更張之詩文
亦然不容不變也隆萬間王李之遺派充塞
公安昆弟起而非之以為唐自有古詩不必
選體中晚皆有詩不必初盛歐蘇陳黃各有
詩不必唐人唐詩色澤鮮妍如旦晚脫筆硯
者今詩纔脫筆硯已是陳言豈非流任性靈
與出自剽擬所從來異乎一時聞者漠然神
悟若良藥之解散而沈疴之去體也乃不善
學者取其集中俳諧調笑之語如西湖云一
日湖上行一日湖上坐一日湖上住一日湖
上卧偶見白髮云無端見白髮欲哭翻成笑
自喜笑中意一笑又一跳嚴陵釣臺云人言
漢梅福君之妻父也此本滑稽之談類入于
狂言不自以為詩者乃錫山華聞修選明詩

從而擊賞歎絕是何異棄蘇合之香取蛻蟻之轉邪予于中郎盡汰其鄙俚之作存其稍用意者對之可以刮目矣

橫塘渡

橫塘渡郎西來妾東去感郎千金顧妾家住紅橋朱門
十字路認取辛夷花莫過楊柳樹

折楊柳

艷陽二三月楊柳枝參差每逢雙燕子憶得別君時憶
得別君時遺君珊瑚枕君行佳麗地何人薦君寢

妾薄命

落花去故條尚有根可依婦人失夫心含情欲告誰燈光不到明寵極心還變只此雙蛾眉供得幾迴盼看多自成故未必真衰老辟彼後開花不若初生草

哀殤

弱腕繫金鈴青絲綰偏髻曾前兩繡囊猶作長命字欠爾三斗乳償汝一升淚輝魂半尺餘荒荒投旅次我嘗靜坐思生死同一例子既先我行即是鬼先輩如彼排

場人尊卑乃相遞一去與一來孰知非天戲

潞河舟中和小修別詩次韻

小艇烟江雨長堤柿葉霜一洲魚子市千樹木奴鄉客
去尋空谷書來話酉陽繁華銷枕上家近呂仙堂

集平山堂用平山字為韻偕游者方子兩謝生也
大業空遺事披圖咫尺間斜橋興廢水淡墨有無山野
老耕香澤妖狐學黛鬟荒亭猶故井馬上挈泉還

揚州曉泊

薄霧隨風盡寒霜對酒銷芋魁騰曉市蟹子落歸潮往
事瓊花觀新溝揚子橋雖然富羅綺未必似前朝

送洪子崖之歸化縣

小邑無官長登臨費履綦方言從事譯山景隸人知廨
舍巢鸚鵡鄉田貢荔枝嵐光侵簿牘長日但圍棋

夏日泛舟

泛泛鶴鵠近深深雀鶴聞空潭不受暑野竹半捎雲公子
收行蓋佳人曬舞裙垂楊亂荇藻日色冷紛紛

登高有懷

秋菊開誰對寒郊望更新乾坤東逝水車馬北來塵屈指悲時事停杯憶遠人汀花與岸草何處不傷神

江上

白霧迷荒楚青流帶遠空沙平晴獻雪樹老夜屯風曠野眠饑兒孤洲落晚鴻布帆如屋裏何處有城中

學齋留梅子馬

踏盡高槐影青蟲落酒巾袖懷三月草衣浣一年塵夢

裏聽朝事杯中覓聖人貧厨非大祭未有肉留賓

別小修

瓜洲雲色蔽天昏腸斷金山寺裏猿狹客也須同海鳥
過江切莫食河豚幕中有主當持牘雪裏無錢且典褲
畫戟如林高丈五不知何處是朱門

託龍君超覓仙源隱居詩以寄之

雲石邨中且卜廬憑君為買一峯餘全栽芝菊為疆界
盡寫雲嵐入券書門對仙童澆藥地巷通毛女浣花渠

閒中準擬天台去好伴劉晨間屋居

送鄒金吾游白下時寓武昌

將軍此日驟征輪楓葉蕭蕭漢水濱
我已銷魂千里外那堪重別故鄉人
西風馬度離亭柳落日衣吹客舍塵
莫向勞勞亭上望秋江容易得沾巾

辛卯元日

滿城佳氣鬱青霄海日如規上海潮率土再興弘治朔
百年三倍穆宗朝柳含初綠風前舞梅帶殘香雪裏飄

笑我疎愚非董子太平猶頌不鳴條

感事

湘山晴色遠微微盡日江頭獨醉歸不見兩關傳露布
尚聞三殿未垂衣邊愁自古無中下朝論于今有是非
日暮平沙秋草亂一雙白鳥避人飛

歸來

歸來兄弟對門居石浦河邊小結廬可比維摩方丈地
不妨揚子一牀書蔬園有處皆添甲花雨無多亦溜渠

野服科頭常聚首阮家禮法向來疎

擬宮詞

玉殿蓮籌夜未央內人傳旨出昭陽朝來剛赴西宮約
莫遣經筵進講章

江上

桃花春水滿江頭獨擁佳人翡翠樓誰抱琵琶江口上
聲聲彈出小梁州

經下邳

諸儒坑盡一身餘始覺秦家網目疎枉把六經灰火底
橋邊猶有未燒書

羅隱南齋中小集憶舊

珠樓曲曲貯仙娃一帶風牕十里紗記得中和門外路
女牆東去是伊家

桃花流水引

華陽巾子碧絲環紫府簾前舊押班阿母筵頭爭一擲

醉中輸却小蓬山

宿朱仙鎮

祠前簫鼓賽如雲立石爭劖弔古文一等英雄含恨死
幾時論定曲將軍

汪盈科 一首

盈科字進之常德桃源人萬曆壬辰進士除
長洲知縣擢吏部主事歷官四川提學僉事

有雪濤閣集

袁中郎云進之詩才俊逸爽朗務為新切但有矯枉之過

詩話進之與袁中郎同官吳下其詩頗近公

安派持論亦以七子為非特變而不成方者

中郎謂其矯枉之過所謂笑他人之未
忘己事之已拙文人通病大抵然矣

讀張魏公傳有感曲壯愍事

子聖焉能蓋父凶曲端寃與岳飛同何人為立將軍廟
也把烏金鑄魏公

詩話徐秀才善敬可一日語予曰周公謹小
人哉張魏公朱子所父事何可毀也予曰公
謹三代直道之遺也宋之南渡將帥有人可
以戰可以守自寄閫外之權于浚喪師動數
十萬元氣重傷譬諸孱夫不能復起矣浚于
李綱趙鼎輩則効之于汪伯彥秦檜等則薦
之尚得云好惡之公乎至曲端之誅與檜之
殺岳飛何以異而讀史者務曲筆以文致端

有可死之罪不過因浚有子講學浚死徽國公為之作狀天下後世遂信而不疑爾中郎詩露膽張目洵詩家之南董也已

唐之屏 一首

之屏字君公松江華亭人萬歷壬辰進士除

常山知縣

詩話君公之官常山鄉鄙贈以僕馬力却之
曰常山丰大縣官便自裝飾苟至三槐九棘
更難踵事增華既而中
讒罷歸養親不復出

登金山

一柱東南表地靈芙蓉萬古插清冷江淮潮色無邊白
楚蜀山光不斷青鯨喻風雷波自撼龍過樓殿雨猶腥
枕流無限滄洲意極目何妨我獨醒

韓上柱

一首

上柱字孟郁南海人萬曆甲午舉人天啓初以
學官上公車遷南京國子監博士

歸里

栗里歸來尚未荒蕪葭深處水周堂一雙白鴨對人語

七尺青梭共我長，
稚子能尋蝴蝶繭。
姑不少鷓鴣香，
此中嘯傲翛然足。
休對仙家問海桑。

陳薦夫

二首

薦夫名邦藻，以字行更字。
幼孺閩縣人，萬曆甲午舉于鄉。
有水明樓集。

海口城晚望

蒹葭藪藪樹蒼蒼，平楚閒看益渺茫。
驛路遶山多落木，孤城臨水易斜陽。
潮迥近浦寒生雨，雁度遙天夜帶霜。

暫息征鞍瀛海上烟波千里斷人腸

竹枝詞

荷葉田田柳色垂三船五船多女兒與郎暗約花間去
不唱竹枝知是誰

明詩綜卷六十二

卷六十二

總校官庶吉士臣張能照

校對官庶吉士臣嚴福

校對官編修臣閔惇大

謄錄監生臣顧振

謄錄舉人臣嚴儀

欽定四庫全書叢要

集部

明詩綜卷六十三

四

詳校官編修臣汪鏞



欽定四庫全書
明詩綜卷六十三

集部

明詩綜卷六十三

翰林院檢討朱彝尊編

朱之蕃 一首

之蕃字元介南京錦衣衛籍茌平人萬曆乙未
賜進士第一授翰林院修撰以右春坊右諭德
掌院印以右春坊右庶子掌坊印升少詹事進
禮部右侍郎改吏部右侍郎贈禮部尚書有使

朝鮮橐南還紀勝諸集

靜志居詩話元介文翰兼工張爐東國與館
伴周旋有倡必和微嫌詩材輕熟語不驚人

和周吉甫春日移居

牆短山齊出庭空月易留香泉浮茗盃漁唱起蘋洲終
歲一無事平生百不憂奔忙渾未解酒伴且相求一作自苦

復何

由

湯賓尹

一首

賓尹字嘉賓宣城人萬曆乙未賜進士第二授

翰林院編修歷中允諭德掌司業事遷右庶子

升南國子監祭酒有膳菴集

詩話嘉賓以黨論受攢譏終以不振詩派
近俚罕足錄者詩中所弔懷寧於國重也

弔同年友於鼎季

落木淒淒江水渾行吟澤畔已聲吞三年地下君安否
人世風波不可言

孫慎行

一首

慎行字聞斯武進人萬曆乙未賜進士第三授

編修歷中允諭德庶子少詹事升禮部右侍郎

回籍起南京禮部尚書改北卒贈太子太保謚

文介有元晏齋集

詩話要典三案羣小切齒者挺擊則朝邑王侍郎移宮則應城楊忠烈紅丸則文介也要典既頒至欲坐公等罔上不道幾且殺公幸思陵即阼得辭戍所復官仍堅卧不起久而赴召甫及都而卒平居研精易學吟咏不甚留意其觀元祐黨人碑有感作云誰知黨人籍翻作褒忠碑曠世相感今古同然矣

遭遇

誰料恩深放棄餘山人猶帶舊銜居中山篋在猶寒膽
上殿爭時判引裾天地有情開一網江湖無夢到三閣
自來多少欷歔感聖主英明古不如

劉一燝

一首

一燝字季晦南昌人萬曆乙未進士改庶吉士
授簡討歷官禮部尚書兼東閣大學士加太子
太保戶部尚書進文淵閣加少保再進少師兼
太子太師吏部尚書中極殿大學士卒贈太師

謚文端有集

歸田作

乞得閒身返故林
避賢者路漫沉吟
當歸分合山中老
戀主情彌闕下深
鑿井耕田歌帝力量
晴較雨荅天心
十年塵夢今番破
一曲滄浪思不禁

陳于廷

五首

于廷字孟諤宜興人萬曆乙未進士授光山知
縣補秀水擢監察御史巡按江西山東轉太

僕少卿歷太常卿大理卿兵部侍郎坐削籍起
南京都察院右都御史召總內臺加太子少保
謚恭定有定軒橐

詩話恭定為予友其年檢討之祖行事詳國
史韻語不甚傳擬江文通雜詩頗稱具體

古別離

三歲為君婦未嘗下高堂一朝遠送別佇立官道傍君
行官柳青君歸官柳黃與君別經年相思莫相忘行過
無定河莫飲無定水天涯游子心飲之恐爾爾應思閨

中人容光易摧毀

擬陳思王贈丁儀王粲

王師入京邑天宇俄廓清九廟肅鐘簴十陵翦棘荆皇
路日就坦相君靡自盈吐哺則公旦闢門羅雋英黃髮
縹珪組深巖貴弓旌嗟余同心侶夙昔諧嬰鳴胡為慕
孤介堅欲解世纓延陵匪通誼干木庸近情願迴墨子
車且過朝歌城

擬王侍中粲懷德

關中構喪亂浮渭向洛城京雖復殘破了身遁蠻荆虎
兕傷在野流離嗟獨行河山邈非故魂魄黯自驚乘桴
浮海若登樓眺神京目斷秦川樹心搖伊闕旌哀哀孤
飛鳥詎有擇木情公子忽我覩欵嗤分瓊瑛魚藻醉明
德鹿革賡和鳴鄙人守貞則嘉惠懷篤誠所期慎厥修
福履永不傾

擬謝僕射混遊覽

大塊真勞生俯仰日榮感內庭鮮懽悰遠郊豁幽覽寓

目極寥廓開襟愜澄澹巖阿秀菊萸江濱揭葭菼會歎
景搖落任觀運流坎代謝亦何常章光總歸闇達人遺
浮榮自視一何歛

擬休上人怨別

楚客思無賴涉秋逾黯然金飈起天末槁葉墮我前素
帷延華月淨琴響哀絃白雪懷郢人滄洲憶成連壺觴
對不舉何以暢幽情

王維儉

一首

維儉字損仲祥符人萬曆乙未進士除知濰縣
徵授兵部主事尋削籍起光祿寺丞累遷大理
少卿以僉都御史撫山東入為工部右侍郎轉
左侍郎有王損仲集

詩話捐仲宋史記子從吳興抄
得之未見出人意表詩頗瀏亮

送霍臨渠少府守河州

不盡湟中路秋風促宦程佩刀辭佐郡分虎已專城積
石攢雲起洮河近郭明羌戎亦赤子休使塞烟驚

王思任

一首

思任字季重紹興山陰人萬曆乙未進士知
興平當塗青浦三縣袁州推官所至鑄級稍
遷南刑部主事九江僉事有避園擬存虞山

詠

詩話季重滑稽
太甚有傷大雅

勺園

纔辭帝里入風煙處處亭臺鏡裏天夢到江南深樹底

吳兒歌板放秋船

蔡復一

二首

復一字敬夫同安人萬曆乙未進士除刑部主
事歷員外郎中出為湖廣參政遷按察使仕至
兵部右侍郎謚清憲有遜菴詩集

詩詰景陵之邪說行率先倒戈者蔡敬夫也其
駢體亦不屑猶人亡友漢陽王亦世最賞之然
以詩論寧取
彼而舍此矣

秋生

夕照盡歸水秋聲半在林飛蟬過別樹未斷曳來

一作舊枝

音

夕陽

夕陽欲下山一半戀流水短笛牛羊歸餘光照童子

高承祚

一首

承祚初名承禪字元錫號鶴城松江華亭人

萬曆壬辰中會試乙未賜同進士出身改庶

吉士受檢討有知古堂集

董思白云鶴城豪飲過人酒邊賦詩

自運

機局

詩話太史生時父夢高僧入其門因名之曰承
禪及萬曆己卯銅梁高中允啓愚會稽羅侍讀
萬化主考南畿以舜亦以命禹發題監臨者方
懷舜禹傳授之嫌內江陰長鄉為應天府尹改
填榜作祚後主司以黨附江陵獲罪鶴城以更
名免桂吏議鶴城廉介自持官翰林二十年田
不加半畝屋不改一椽

予聞之李高士延昱云

聚首

人生聚首難離別何可久去日三春花半朝九秋柳

沈覃

九云語不在

深詩家合作

賀燦然 二首

燦然字伯閣秀水人萬曆乙未進士授行人升
吏部主事終員外有六欲軒五欲軒集

詩話吳中伍御史袁萃撰林居漫錄詆謨前輩
清亂是非吏部不平作漫錄評正駁之御史復
撰駁漫錄評正吏部又作駁駮漫錄評正兩公
不亦好辨哉然合而觀之曲直自見國史所宜
審擇也

泊彭城

山城多宿雨日暮起悲風賈客行將絕中涓計已窮叩

閭雙闕迥縣磬九州同應有輪臺詔朝來出漢宮

邯鄲懷古

雲迷襄國雨霏微舊日叢臺過客稀三晉河山仍不改
六王宮殿已全非照着池冷荒苔合講武臺空野雀飛
猶有邯鄲樓上月餘光常照酒人歸

米萬鍾

一首

萬鍾字仲詔宛平人萬曆乙未進士除永寧知
縣補銅梁再補六合入為大理右評事遷戶部

主事升員外改工部進郎中出為浙江右參政

升江西按察使有北征吟

詩話先生為水曹卽築園海淀之北中有色
空天太一葉松垞翠葆榭林於漢總名之曰
勺園又曰風烟里自念園在郊闊不能日涉
因繪園中景為燈丘壑亭臺纖悉具備都人
爭尚之號曰米家燈睿於元夜集客賦詩麗
水呂太常邦耀即席口占二首其一云玉銷
疊出上元村雙炬懸來景物繁況惚重游丘
壑裏米家燈是米家園其二云輕舟寒夜渡
無冰波入銀綃訝月升宛似夢中曾一照米
家園是米家燈一時和者數百人列成一集
可稱好事亦太平佳話也

新秋泛清溪

共客邊新爽迴舟刺晚風涼生思越綺病起訶燕鴻星
櫂搖虛白漁燈簇小紅怪來蕭颯早衰草怨吳宮

范允臨

二首

允臨字長倩松江華亭人居吳縣萬曆乙未
進士授南兵部主事改工部歷郎中以按察
僉事提學雲南遷福建布政司參議有輸寥

詩話先生筆精墨妙揮毫落紙與董尚書爭
工晚作別業於天平山之陽彈絲吹竹選技
徵歌江表望為神仙中人又得佳耦唱和傳
鈔片楮比於珊瑚之鉤范氏家藏遠祖隋及
唐時告身尚在文正忠宣諸老手澤猶新義
田長以振窮宰未未嘗改列清門百代四姓
及遠不及也

有憶

井唾不復顧花飛難再攀江頭一片石應化女郎山

咏翦春羅

君恩宴曲池為郎製宮錦月落杏花寒裁縫剪刀冷

沈琦二首

琦字仲玉吳江人萬曆乙未進士除淄川知縣
以憂歸起補高陵再調三原入為禮部主事有
珠樹軒豪

送馬長山擢守檇李

我家住江南只盼江南路君今正向江南行却望君家
又回顧執手空嗟離別難齊人感咽越人歡只今南北
蒼生望總向循良傳裏看憶昔文君頓成契芝蘭金石

盟前締相逢春日春更融相別秋風秋轉厲江南土俗
舊清嘉到處風光盡可誇天目峰頭雲吐月餘杭城外
水漂花天子黃扉方側席致治思同二千石語君暫作
江南行會捧徵書向江北

別家次諸兄弟韻

握手他鄉路回頭故國城漸驚親舍遠真覺一官輕急
櫂隨雲影悲笳雜鴈聲無情東去水相對亦淒清

沈 坞 一 首

琬字季玉琦弟與兄同榜登第由鳳陽府學教
授遷南國子監博士升南刑部主事歷郎中出
知東昌府轉山東按察副使

漂母

偶然一飯進王孫答贈千金未足論何事怨家還報德
淮陰年少亦推恩

陸錫恩一首

錫恩字伯承平湖人萬曆乙未進士除萬安知

縣入為刑部主事歷員外郎有雙鳶草

詩話伯承不耐判牘放情山水間自號夢蝶居士又號癯丈人亦號癡丈夫年四十二自撰擴誌而殞詩

鮑叔牙故里

落景滿齊郊雲橫暮山紫緩轡問遺封云是鮑叔里三北識奇才一匡酬夙恥古人在信心今人多貴耳士苟未遇時畢生行蓬累長風不我借羽翼安得起所以管

大夫沒齒感知已

袁時選 一首

時選字無擇鄞縣人萬曆乙未進士除遂溪知
縣遷南刑部主事

新興道中

偏側新興路逶迤傍水隈萬山迎馬合片雨逐人來
獵騎偏穩江鷗下不猜頻年牽犧役延眺亦悠哉

呂克孝

三首

克孝字公甫青浦人萬曆丁酉舉鄉試第一官

工部司務歷郎中有媿翁詩草

詩話公原領解之秋先文恪葉文忠偕主試事先公業拔公原卷將置第一矣文忠謂是卷文雖高慮終不得第先公云吾亦知此人不第然學者也榜遂定既而公原屢試南宮輒擯落以學行稱於時先輩衡鑒不爽若是天啟初公原官工部司務時先大父君竊公承蔭選授都察院照磨署經歷司事同公原建首善書院乾魚脫粟比汚墁匝石不有加味書院成大父已遷官故碑記不列名旋為染夢環所禪下獄思陵即除得釋晚知楚雄府事歸貧不能治舟楫而公原還里詰窘畧同其詩有云客歸三日典春衣又云慣住低頭屋能炊折脚端殆實錄也

青谿卷

江令何年宅風流不可招荒烟迷斷礎陳迹寄空寥日
影移雙樹谿聲自六朝遙分鐘阜影紫翠落層霄

棲霞寺

宅記明僧紹碑傳江總持淒涼自入代窈窕隱山茨明
月千巖宿松風萬壑垂階前雙杏樹曾見劫灰時

過田叟

我欲驅黃犢移家傍屋東但容茅蓋頂先為築牛宮

胡震亨二首

震亨字孝轅海鹽人萬曆丁酉舉人官定州知
州有赤城山人豪

歲晏悼室人詩二首

歲晏感物變志意鮮歡愉念我同懷子涕下沾衣襦如
何苦寒節衾裯不復俱空闔一以閉飢鼠晨夜趨光儀
況不滅魂魄知有無煩寃日盈抱寧從促景徂
空牀凜寒風殘照慘夜色沉思結幽感夢子來我側腳

蹠將何憇容輝忽已匿昔如中洲鳩關關雙鼓翼今如
失羣獸哀鳴不遑食庶無苟生鄙媿彼蒙莊識豈伊生
死情含義良不忒

查應光一首

集

應光字賓王休寧人萬曆丁酉舉人有麗崎軒

澹碧軒

門開日影來一片蒼苔色花氣引游人山風吹未息

趙秉忠 一首

秉忠字季卿益都人萬曆戊戌賜進士第一
除修撰累官禮部尚書贈太子太保有嶧山
集

送張水部南歸

平子歸田去山川賦舊游遺榮繞北闕高興已南州
鱸三江月菰蒲五月秋襟期知曠達尊酒寫離憂

顧起元

六首

起元字太初江寧人萬曆戊戌賜進士第三除
翰林編修累遷南京國子監祭酒終吏部右侍
郎兼翰林侍讀學士謚文莊有嬾真草堂集

園漫藁

方正學先生祠墓

白馬魂空結丹蛇識豈真九重原叔姪一死自君臣鼎
鑊當時事蒸嘗異代入西山一抔土寂寞亦冬春

舊傳建文

君葬於西山
不封不樹

黃河

河水南浮泗漕渠北注燕衆心憂璧馬天意護樓船龍首疏秦日鴻陂復漢年園陵看王氣松柏正蒼然

彭城

九日彭城道高天白鴈來但聞楓葉下不見菊花開風起橫蛇澤雲橫戲馬臺江闊何處所一望一徘徊

閨體

莫上翠樓看望見官城渡垂柳碧於蔞是郎去時路

曉行道中

曉風蕭颯逗疎楊此日關山別恨長試聽高城吹画角

秋河不動月如霜

靈濟宮

星幢霞旆畫繽紛十二瓊樓駐彩雲鸞鶴紫霄時上下
步虛雙引玉晨君

何如寵

一首

如寵字康侯桐城人萬曆乙未進士戊戌殿試

改庶吉士除編修歷官少保戶部尚書武英殿大學士贈太傅謚文端有後樂堂集

七十自壽

黃龍柱自說三關白鶴何須鍊九還醉客豈真千日醉
閒人難到十分閒清溪水滿長搖艇紅雨春深一看山
時至便行無不可幾能塵世駐朱顏

周如磐一首

如磐字聖培莆田人萬曆戊戌進士改庶吉士

歷官太子太保禮部尚書文淵閣大學士贈少

保謚文懿有澹志齋集

采菊

高秋凜風色百草遞萎黃嘉彼東籬英參差衰露光采
之不盈掬悠然傾我觴杖策寄事外仰視歸鳥翔會心
水木間獨坐以徜徉

熊廷弼 一首

廷弼字非伯江夏人萬曆戊戌進士除保定推

官入為工部主事擢浙江道御史巡按遼東提學應天遷大理寺丞以兵部右侍郎右僉都御史經略遼東駐山海關進尚書兵潰棄市傳首九邊有性氣先生集

新卜東園

為愛池塘好辟喧新開別業向東原梅山樹遼斜連谷蓮渚橋通直到門傳是舊時花柳巷竭來漫作桔槔園主人初領林泉事鎮日經營不憚煩

陳邦瞻 四首

邦瞻字德遠高安人萬曆戊戌進士除南京大理評事升工部員外轉郎中出為浙江參政歷福建按察使河南左右布政使以右副都御史巡撫廣西以兵部右侍郎總督兩廣終吏部左侍郎有蓮花山房集

江南樂

鷓鴣南枝鳥愁從北鴈去儂家在江南但愛江南住

歲時還七夕風俗更杭州聞道湖船女爭歸乞巧樓輕
雲籠月度疎樹帶星流不有乘槎客憑誰識女神

久雨

久雨牆苔積濃陰死樹遮席門寒下雀蒿徑曲藏蛇浦
水連街闊江潮帶閣斜誰憐都會地卑溼似長沙

辛丑之秋自留署乞假歸省沿途觸景輒成

水次蒹山次昏星復曉星古城巢父廟仙迹呂公亭日

落山光白雲流石氣青橫塘秋浪闊鷗鳥自冥冥

畢懋康 一首

懋康字孟侯歙人萬厯戊戌進士除中書舍人

擢廣西道御史厯官兵部右侍郎有管溢西清

二集

束茅行

候人何太苦早晚迎官府閒積數根茅為炊且結宇官
府中夜行不絕吏呼聲燃火照官路猶云火不明燃茅

茅無束次第拆茅屋官府猶未知宵征車轔轔

董應舉二首

應舉字崇相閩縣人萬曆戊戌進士授廣州
府教授升國子博士歷吏部郎中南京大理寺
丞太常少卿太僕卿終工部右侍郎有董崇相

集

雜作

小官事大官曲意迎其喜事親能若茲豈不成孝子

丙寅聞邊報

出山已分沙場死今日生還亦主恩忽報遼陽飛騎近
白頭垂泣向江門

徐良彥一首

良彥字季良新建人萬曆戊戌進士知婺源溧
水二縣擢河南道御史外轉福建參議轉山東
按察副使入為尚寶司少卿歷大理寺丞右通
政以右僉都御史巡撫宣府回籍起南大理卿

升南工部右侍郎

詩話侍郎語多獨造其塞上曲云長城陳死人有力皆如虎亦警策也

落葉

落葉不上枝因風亦復起清風本無私何因有彼此一葉隨飄蕩一葉沾泥滓寄語風前葉莫墮東流水

洪瞻祖

一首

瞻祖字貽孫仁和人萬曆戊戌進士改庶吉士授兵科給事中謫知嘉定縣稍遷南行人司副

累遷太僕卿以右都御史巡撫南贛有清遠山

人漫豪

題李都督朝鮮圖

王者安天下終資不戰功金城圖畧上青海戍樓空長
笛關山月寒砧木葉風還將憂國淚添入錦題中

鄧 漢六首

漢字遠游建昌新城人萬曆戊戌進士除浦江
知縣調秀水再調內黃徵授河南道御史巡按

雲南升山東副使轉浙江右參政山東按察使
擢右僉都御史撫順天有留夷館南中紅泉諸
集

詩話遠游詩敦琢而出頗近俞羨長何无咎
二山人微嫌鬱鬱耳然勝楚人之咻多矣

武定變

朝登武定城暮宿抵羅次有何龐眉叟遮車泣訴事問
叟何所苦問叟何所覬叟耄復健忘憶一不記二往者
萬歷初邊守幸康乂守令咸得人民物鮮札厲伍伯不

到門什一有恒稅斗米纔十錢半鎰易一醉龜貝自轉
輸工價集駢坐相歡太平人但供角觴戲嗚呼廿載間
乾坤一幽閉中丞文且武抵掌談封拜羽檄豈虛來兵
革靡寧歲忍以百萬命而快一人意忍白千里地而希
茅土賜守臣本蠭賊中璫甚狂猘此輩紈袴子況彼糞
除隸咆哮而負嵎逢者鮮不噬不忍因民怨奈何虎冠
吏一夫敢倡難餘孽竟昌熾訛傳寇初集頗遭守者誓
疆勉授殘甲垂頭望睥睨蜂涌圍已合蟻薄城遂潰巷

戰力不敵免胄期殞碎烈烈金與王闔門竟死義完轉
蛾眉女慷慨丈夫氣泣抱黃口兒牽挽及姊姒相繼付
烈燄義不汙賊鑽草間苟求活羞彼郡都尉難撲燎原
火易乘破竹勢中丞文且武小醜曾帶芥下令城中外
母得輒引避按堵第如故已定退賊計賊來如風雨剝
膚患孔亟晨興牙門啟文武咸就位寇賊在門庭請問
計安出中丞噤無語汗流手顫悸但云烏合衆不久自
當退城外鼓盈天城中哭震地賊徒皆重鎧踉蹌錯其

臂每聞得漢兒刃腹必洞刺剗腸絃樹枝鳥鳶下爭食
尸積雲津橋血流溟海澨中丞非不武空拳安可試登
樓望賊徒懼然思所畏或用緩賊謀姑為好語慰彼賊
若罔聞瞋目仍攘袂惡詬至不堪左右皆沮媿甘受城
下盟竊發虞姁細犒用十二牛文錦先皮幣甚繁織成
衣黃金鈎落帶銀印龜形鈕本自上方製名器最輕假
曾謝挈餅智賊衆始拜舞觀者猶惴惴賊來荷戈入賊
去駛金回

何對切

可憐窮寇攘抑作犬羊配虜獲動無算

男婦必累騎輜重百里間綿綿行不絕

此尚

羣賊固驍

悍小勝輒狃

餘制功

中丞文且武開門悉精銳擊歸伺

其怠小醜安足殲但聞攀牆看誰將一矢遺

去聲

夷民舊

部落府主新儀衛前歌後有舞送歸刺史解昭昭漢日

月幾向蠻天墜忽死幸湏臾延頸王師至焚香拜馬首

雙頰如雨淚不意溝壑軀復覩漢旌幟感激活我恩人

持一笥餉長跪主帥前帥聞乃大諱怒聲吼如雷立命

三軍士居此圍城中盡與賊勾結

吉詣功

從賊有顯戮任

其所斬刈軍士擁向前兩手猝其髮

方味切

舉刀便欲斫

觀者但睭眙叩頭連乞命我輩有何罪爾輩實無罪是

爾命盡日

而至切

昨傳中丞令首開購級例重賞不踰時

以此競趨利按賊無所得失利且有害頭顱許借我誰

能別真偽老幼聞此言號擗淚盈皆生旣無門控死當

訴上帝駢首就鋒刃流血如泉沸次第列功狀報捷日

三四中丞啟捷書抵掌大稱快催軍益前進功多賞亦

倍傳教諸將營努力功名會今年殺諸賊金印如斗大

當取懸肘後急擊慎勿失

式吏
切

天網恢恢布多殺神所

忌逆賊旣就俘將吏亦被逮糜爛同一理誰逃百六阨

烏懈
切

叟昔有三子諸孫繞膝嬉酷經喪亂來並無鬚鬢

嗣田園旣蕪沒居室遭焚燹親友凋殘盡生理迷所寄

人皆羨高年高年有顚頷歎息老叟語停鞍重歎欷

去聲

名變良有初妖象著為孽町疃作戰場噫嘻豈偶值

閒居

敬通居里日彭澤去官辰酒熟邀田父花時對孺人素

琴橫竹几藜杖挂巾在世無明畧猶堪傳隱淪

田家樂

二首

烟火高原合雞豚小市通夜行防虎阱寒至築牛宮捕雀遵桑翳澆麻引竹筒今年倍收秫不怕甕頭空

挾彈驅田鼠持竿放野豚但令倉有粟寧使婦無禪賣藥曾過市催租少到門不知今去漢歷代幾兒孫

奉陪蘓中丞游招寶山同作次壁間韻

突兀如臨碣石傍天青島嶼辨微茫千年陰火疑潛熱

三足陽烏本內翔魏闕遙瞻天北極戈船爭指日南王
臣心似水朝宗遠一任沮洳變作乘

春日述懷寄湯義仍四十韻

漢域春陰盡蒼山旅病淹梯航三面入風壤百夷兼五
尺通秦道單車即瘴炎接荒虛繡斧覽勝引丹幡市有
紅藤篋家珍白井鹽萍蹄規海闊峯嶺粵露峰尖霜清長
含潤溫泉側注瀉衣冠餘僰爨貨貝古閣閣茉莉簪花
豔酴醾釀酒甜緬文披似篆蠻語聽猶譁烽燧宵常警

萑蒲日戒嚴由來稱卉服未可廢戎鉞往者勞徵發王
師快殄殲傷心多戰哭無術救危阽退食聊閒步幽吟
却卷簾礎雞初學卜射隼竟空占牽拙身何補浮湛趣
自恬恠看顛種種轉益貌廉廉藥裏頻教命觚毫嬾欲
拈神龜寧要灼廄馬剩須箝自笑名為累誰知意所忺
以予嬰世網念子獨淵潛客坐閒垂釣妻鉏並擁鎌游
魚窺硯沼微雨映書籤句琢文心巧詩推筆力銛七襄
勞組織一字費鍼砭善戲非為虐雄文合愈疚木蘭舟

汎汎荷芰帶襜襜麗曲傳箏柱閒情詠鏡奩吟當花纂
纂舞愛玉掺掺多取天應忌高名已亦嫌餘生甘劙削
抵死乞髡鉗老態杯中失窮愁病裏添澤麋安飲啄涸
鮒且喝噉世外論歡賞私衷早屬蜃峯蹄自有契膠漆
乃非黏別怨稱殊未歸期歎不詹春心傷碧草秋望滿
蒼蒹饑渴思瓊樹書題倚素縫空庭無過鴈竟夕坐明
蟾今古論冤憤乾坤幾顧瞻已而應謂鳳宛彼一鳴鶴
種竹藩官舍看雲到步檐池萍青靡靡砌卉綠纖纖憇

關心徒奮傷時口合鉗風塵途漸迷原野氣猶燭輦轂
憂胡越深宮嘆釜鑿迷津憐弱喪回策庶西崦瘴海愁
空說鄉園淚暗沾思君遙送目烟雨晦巴黔

毛 堪 一 首

堪字公輿吳縣人萬曆戊戌進士除吉安推官
選授廣東道御史升大理寺丞歷官南京通政
使卒贈工部右侍郎

蘭津謁武侯祠

羅岷山勢接哀牢丞相曾經駐節旄尚有里巫鳴社鼓
依然陣石出江槽偏安西蜀非初願深入南方豈憚勞
精爽不隨炎漢盡蘭津終古薦溪毛

何棟如一首

棟如字子極無錫人萬曆戊戌進士除襄陽府
推官以阻礦被逮起南兵部主事升太僕少卿
監山海軍有南音攝園二集

午日秦淮雜詠

深潭日落停舟滿高柳橋迴夾岸齊燈影不分波下上人聲莫辨水東西

范鳳翼二首

鳳翼字異羽南直隸通州人萬曆戊戌進士除
濠州知州屢遷吏部郎中天啓初歷尚寶少卿
以朋黨落職崇禎初起復尋遷光祿少卿有勳

鄉集

鄭玄岳云公在吏部以用賢遠姦為已任
有一君子必亟進之如顧端文高忠憲是
也有一小人必亟退之如楊繼杜廉牛惟曜是
也其見善如渴見不善如讎而忌者至矣以八

年里居之官而星拾遺之疏以十七年不入都門之人而奉削奪之旨公獨處之怡然所謂德音不瑕者與

水閣

涼飈動水閣卷幔坐能幽竹嶼連朝雨荷池三伏秋茶聲入高枕花氣上層樓鎮日無人到凭欄數白鷗

夏日李後岡先生五柳園讌集

三徑何幽勝居然陶令家涼風鳴豆葉疎雨落桐花虛院疑秋早深林信日斜最憐塵事隔心賞足烟霞

秋日渡江

瓜渚輕舠破浪風。金焦山麓亂流中秋高。
不避波濤險，欲看江南柿葉紅。

鄧雲霄一首

雲霄字元度東莞人萬曆戊戌進士除長洲知
縣徵授南京戶科給事中升湖廣僉事歷四川
右參政湖廣左參議降陝西僉事調廣西升右
參政有百花洲集

隄上行

萬井樓臺落鏡中
環隄處處小橋通
吳娃慣蕩蓮舟劇
水淺沙明不畏風

吳文企

四首

文企字季騶號白雪南京旗手衛籍景陵人萬
歷戊戌進士除戶部主事歷郎中出知寧波湖
州二府終陝西按察副使有絮菴慚錄

詩話白雪廉吏守湖州時爨薪不給課僮僕刈
後園豐草折枯樹以收拾得石一片上有玉筍

二字其旁題識已滿乃宋元豐間物笑曰太守落落如此石石應太守將去及遷秩載之以歸

置香雨樓聞至今尚在也其號
蘆集在湖所著詩頗饒清韻

題資福寺同寮友作

行到寺邊寺坐看山外山講堂分戶牖野席對溪灣暗水香厨引高雲絕頂還茶爪深話久欲起更牽攀

登定海八面樓望海

便欲乘潮去登臨小白華憑誰辨灰劫無術算河沙開士元居海仙姑舊姓麻蓬萊幾清淺好問蔡經家

汎舟碧浪湖

二首

紺塔高懸山寺蘭舟不遠人家載出邨莊兒女折來楊柳桃花

小櫂白蘋洲渡輕帆碧浪湖風歸到郡城春望湖山盡在樓中

沈孝徵

一首

孝徵字公廉海鹽人萬曆戊戌進士除工部主事歷郎中出為河南按察副使有玄暢閣集

顧太

初云公廉諸體未嘗不
師古人而惟陳言務去

陪祀長陵

憶昔攀龍向鼎湖，幾回清夜聽啼鳥。
南來風雨羣山合，北望關河落照孤。
累葉衣冠瞻祖廟，中宵綵仗發清都。
霜華滿地松楸冷，英爽于今陟降無。

高 出

八首

出字孩之萊陽人萬曆戊戌進士知曲周高陽
盧氏三縣升南京戶部主事歷郎中出為蘇松

參議遷副使轉河南參政升按察使降廣寧

道監軍副使改西平堡監軍有盧隱郎潛二

集

馮元成云孩之詩能不襲陳言焦弱侯云孩之因故為新去俗從雅譬之朗玉孤

桐自中

天津

詩話孩之家本東萊不襲歷下遺派如蘋婆果初生食之味雖近醕猶勝冬月儲藏軟同

綿絮

古意

鳳鳥久不至丹穴邈難尋如其今來儀不異他山禽所

以鳴岐後千古閼其音

箕山

箕山於太室如岱有梁甫輔嶽並稱尊他山遑敢侮穎
水源更清石流歷可數所以讓王人洗耳臨其許一瓢
棄陶唐飲牛媿巢父後代鮮若儔高風激千古

野憤

三十六年秋高子居子號再覩燕辭壘感我留滯客葉
墜洛水清虎鬪熊耳夕時物惕所懷山川察今昔塞峩

入雲雪八月中天白牛羊懸蒼崖橫術帶阡陌其人或
巢穴其俗無蓄積催科更復拙課殿甘督責十載曉吏
事無能效涓滴折腰如尺蠖妻妾交不憚空谷幸無人
時縱尋山屐庶少填委煩且免多口謫四海今小康天
威儼咫尺恭聞聖節前臺省員滿百意氣富指陳容易
輸肝膈封事報寢多往往生彈射元氣存碩果剥廬獨
安適夫誰作厲階至今餘毒蠻天聽愈以高罵訟竟何
益黨禍歷殷鑒賢者宜自惜紛爭羣小利危言徒噲噴

虺蜮與鬼狐影響襲其迹國事視勝負秦越比肥瘠君
子處嫌疑虛名中一擲乾坤氣日短萬姓生理索嫠緝
誠過慮不敢不跼蹐巍巍太祖功百世可憑藉天子堯
舜資式瞻四門闢恭已治無為洛蜀得冰釋小邑物亦
遂豁此窮愁癖

洛中感秋

紅樹邙山路西風颯已發鶯東京有遺事游客不勝情金
谷銅駝地周公名伯城二毛動秋興三十豈成名

亭山園次道岸韻

野色臨高閣天風落綺筵屏寒松柏雨杯淨薜蘿烟細
逕分離斷春畦抱井圓置塵憐市眼應接轉茫然

答贈劉載甫比部言別

五月江流漲家人苦鬱蒸把君贈佳句忽似踏層冰為
別亦常事忘情終不能漸深交態後知已感偏增

自德州買舟北上紀見

茫茫四野水水鳥掠風帆土屋無人閉江艘有使監新

魚隨罩得遺穗進桴芟出涕憂無象涼颸拂露衫

允修山林還作此奉問

西山積翠抱長安銀海瓊泉勢巒盤千樹春雲靈寢覆
萬年仙月侍臣看旌旗羣帝迴鑾合風雨諸陵委珮寒
司馬相如消渴甚欲因多病乞祠官

何慶元二首

慶元字長人六安州人萬曆戊戌進士授工部

主事歷郎中出為雲南按察副使有遠來室存

豪

新浴夜坐

殘暑渾無賴炎炎赤日懸裸宜新浴後涼愛晚風前團
扇蒲葵歇方牀莞蒻便明河想清淺烏鵲易教填

雨霽

積雨晨初霽歸心客轉多薄雲天縹緲深淖馬如何秋
水發新漲孤帆揚遠波柴扉休更掩或者麌車過

黃汝亨

一首

汝亨字貞父仁和人萬曆戊戌進士授進賢知
縣升南京工部主事歷禮部郎中出為江西提
學僉事轉參議有篤庸集

西山

悠悠逆旅間忽如意不展振策西掖門佇覽西山嶽北
風紛車塵晚日出林暝遵塗泛洲渚披草踐平行水清
既近瞻峰遠亦流緬故術尋峻嶽新溪遞深淺靈巖恣
冥搜秋容歷餘暉營魄境互託貴賤理無選微尚儻有

愜非譽自茲遣

張履正

三首

履正字我先山陰人萬曆戊戌進士除應天府

學教授歷遷戶部郎中出知廣信府有吾兼堂

漪漪館二豪

送張二府擢太平守

南粵羈縻地旌旄漢守行解維春浪闊到日夏雲生風

帰蠻天瘴威傳遠徼名聖君應有意賴爾作長城

送別夏京兆

如何夏京兆宦況獨蕭然
鷄肋君寧戀羊腸我自憐烟
花洞庭路風雨石城船分手
從茲地相逢何處天

送堵師甫方伯之任嶺南限韻

熊車曉發建朱幢帝簡名賢任大邦
南海諸侯推最長中朝國士本無雙
風清合浦明珠返雨過炎洲瘴癘降
相送一尊須盡醉明朝回首隔滄江

阮自華 一首

自華字堅之懷寧人萬曆戊戌進士除福州府推官歷遷戶部郎中出知慶陽府再補邵武罷

歸有霧靈集

詩話堅之硃宕縱飲為理官扶醉入謁巡按方下拜酒污御史衫袖遂挂彈章晚為郡守不視吏事惟與賓客分簡賦詩遨遊山水而已嘗大會詞客於凌霄臺推屠長卿為祭酒綠管交作列炬熏人復為巡按所糾庶幾狂簡之士乎詩不求工君子誦詩論世寧舍詠懷堂而取霧靈

集也

歸路

歸路數千里斜陽咫尺間角聲斷城堞離恨起鄉關宿
鳥先人入江流背客還月中聽砧杵游子復何顏

曹徵庸

四首

徵庸字遠生一字平子平湖人萬曆戊戌進士
辛丑殿試由延安推官入為大理評事選刑部
主事歷員外郎中終汾州知府有冰雪軒詩集

沈容子云遠生詩蒼
涼曠達多出塵之想

詩話汾州詩品超逸誦之
如食哀梨脆棗大是爽人

黃岡道中

芳草展柔綠十里冒長堤藤花覆高岡下與垂楊齊穀
雨春欲盡雙禽互悲啼行子感于後思歸息山谿閒看
理綸繩坐釣桃花西及春事耦耕烟蓑引鉏犁斗酒勞
作苦壺觴恣提携何為深泥中沒此青驄蹄

秋興

愁來白紵一停歌老去青霜兩鬢過點點夕陽高鳥沒
蕭蕭秋柳暮蟬多冠軍出塞嗟何及前著籌邊定若何

昨夜城南橫索馬傳呼客騎渡黃河

和秋柳詩

長信宮前幾樹凋風吹灞岸更蕭蕭空勞好夢二千里
無那輕霜十萬條青眼乍迷魂黯黯蒼烟忽暗路迢迢
却憐二月春寒淺占斷東風紅板橋

南康官舍

偶住江城池上亭長松苦竹伴餘清牆西秋色斜陽外
截得廬山一角明

陳允升二首

允升字雲達烏程人萬曆戊戌進士滁州知州
有燃藜閣遺稿

秋日苦雨

秋水漸浮隄青禾白鷺棲祝筭空有意抱甕已無畦蛩
欲依人訴鳩偏逐婦啼不堪翹首望天際濕雲低

碧浪潮

城外烟波浸碧天城頭烟火萬家連中流塔影浮寒玉

隔岸風光入畫船一片松雲歸獨鶴千秋俎豆列三賢
由來問俗多淳樸不似西湖競管絃

劉世教

一首

世教字少彝海鹽人萬曆庚子舉人官廣乘知
縣有研寶齋橐

古意

高樓有思婦光采瓊樹枝陸離雙佩玉明珠綴巾綦摻
摻出手爪哀哀寫芳辭清商未終曲聽者淚已滋良人

無故懽賤妾無前期空憐夜夜月流影過重楠

王嗣奭

二首

嗣奭字右仲鄞縣人萬曆庚子舉人有密娛齋集

九日聞范君材補官戲簡

龍山吹帽日北闕賜環新好飲黃花酒休令笑逐臣

舟中即事

黃河杳無際白浪卷山回不待窮源去方知天上来

明詩綜卷六十三